



PREZIDÊNCIA  
KONSELLU  
MINISTRUS  
VIII GOVERNUN KONSITUSIONÁL



Gabinete  
Porta-Voz

Loron 3 fulan-fevereiru tinan 2022

### Komunikadu Imprensa

#### Inisiativa limpeza jerál mantein no hala'ó nafatin kada sexta-feira

Governu sei kontinua asaun limpeza jerál, ne'ebé sei hala'ó husi funsionáriu órgaun no servisu administrasaun públika sira hotu iha nível nasional. Inisiativa ne'ebé hahú ona iha semana kotuk, sei hala'ó mós iha aban, loron 4 fulan-fevereiru tinan 2022, durante loron tomak no sei realiza iha kada sexta-feira.

Ministériu Administrasaun Estatál sei sai nu'udar responsável hodi divulga ba órgaun no servisu sira iha administrasaun públika nian, norma sira ne'ebé liga ba organizasaun no distribuisaun ekipa sira ba limpeza jerál.

Governu apela atu mobiliza populasaun hotu atu halo parte iha realizasaun asaun limpeza jerál iha fatin públiku, bairru no sira-nia hela-fatin.

Kampaña limpeza ida-ne'e hanesan parte husi medida sira atu kombate surtu denge ne'ebé hala'ó ona husikedas fulan-dezemburu tinan 2021, husi Ministériu Saúde no entidade governamentál no parseiru sira seluk. Husi atividade oioin ne'ebé elabora hodi luta kontra surtu ida-ne'e destaka asaun fumigasaun no kriasaun unidade ida ba tratamentu pasiente sira denge nian iha klínika Vera Krús.

To'ó momentu ne'e rejista ona total kazu hamutuk 1407 no mate 22, tuir dadus ne'ebé fó-sai horiseik husi Ministériu Saúde. Dili maka munisípiu ida-ne'ebé afetadu liu, ho total kazu hamutuk 925.

Aleinde kuidadu sira ne'ebé adopta ba prevensaun denge nian, Governu apela ba populasaun atu mantein vijilante no adota mós medida preventiva sira ba COVID-19, ne'ebé haree ba número infetadu ho SARS-CoV-2 no propagasaun variante Omicron iha ita-nia rain ne'ebé daudaun sa'e maka'as.



Palácio do Governo,  
Avenida Presidente Nicolau Lobato,  
Dili, Timor-Leste



# PREZIDÉNSIA KONSELLU MINISTRUS

VIII GOVERNUNU KONSTITUSIONÁL



Gabinete  
Porta-Voz

Iha semana ikus ne'e, númeru kazu aumenta ho signifikante no dadus ne'ebé horiseik fó sai husi Ministériu saúde hatudu katak daudaun ne'e kazu ativu hamutuk ema na'in 268, entre númeru ne'e ema na'in 266 iha Dili.

Husikedas inísiu pandemia nian, Timor-Leste rejista kazu infesaun husi coronavírus hamutuk ema na'in 20 136 no ema na'in 122 mate ona tanba infetadu ho SARS-CoV-2.

Governu apela ba populasaun hotu katak karik iha sintoma sira hanesan isin-manas, me'ar, kakorok moras, konstipasaun no difikuldade respiratória ka susar atu dada iis, bele ba iha sentru sira saúde nian atu halo lalais diagnóstiku ba moras, atu nune'e bele evita situasaun sira ne'ebé grave liu.

Atu impede propagasaun COVID-19, Governu apela ba sidadaun hotu nia kolaborasaun atu adopta medida sira prevensaun nian hanesan uza máskara, fase liman beibeik, evita atu tau liman ba oin, mantein distánsia pelumenus metru ida, liuliu ho ema sira seluk no evita halibur-malu ho ema barak. **Remata**



Palácio do Governo,  
Avenida Presidente Nicolau Lobato,  
Dili, Timor-Leste